

TARIKH	30/1/15	MUKASURAT	66
HARI	Isnin	RUANGAN	Business

Harga minyak tak pengaruhi tarif elektrik

Kuala Lumpur: Penurunan harga bahan api petrol dan diesel secara berperingkat pada akhir tahun lalu dan terbaru pada 1 Januari lalu susulan kejatuhan harga minyak dunia memberi kesan positif kepada pengguna kenderaan tetapi ia tidak bermakna tarif elektrik akan turut turun kerana harga bahan api yang digunakan untuk menjana tenaga adalah berbeza.

Ketika ini, Tenaga Nasional Berhad (TNB) menjana elektrik menerusi pelbagai sumber penjana. Gas asli berpaip dan gas asli cecair (LNG) adalah penyumbang terbesar sehingga 55 peratus, manakala selebihnya menerusi gabungan arang batu, hidro dan tenaga diperbaharui (RE).

Kementerian Tenaga, Teknologi Hijau dan Air (KeTTHA) dalam kenyataannya minggu lalu berkata, sebarang kenaikan dan penurunan harga minyak mentah dunia hanya akan memberi kesan kepada harga LNG selepas tempoh lima hingga tujuh bulan kemudian.

Menurut KeTTHA juga, terdapat banyak faktor yang mempengaruhi mengapa semakan semula tarif elektrik tidak dapat dilakukan ketika ini, antaranya ialah harga pasaran LNG yang dibekalkan ke Semenanjung Malaysia dihubungkan dengan harga LNG Bintulu dan harga Japan Customs-Cleared Crude yang mempunyai kesan pengekoran harga masing-masing dua hingga empat bulan serta lima hingga tujuh bulan.

Penganalisis pasaran berkata, sebarang pergerakan kenaikan atau penurunan pada harga minyak mentah dunia akan hanya memberi kesan kepada harga LNG selepas lima hingga tujuh bulan.

Beliau berkata, penggunaan gas asli di sektor penjana elektrik melebihi 1,000 mmscfd (standard kubik juta padu sehari) dengan 1,000 mmscfd pertama daripada jumlah penggunaan gas ini adalah dikira sebagai penggunaan gas berpaip dan dijual pada harga yang ditetapkan oleh kerajaan (harga subsidi) iaitu RM15.20/mmBTU (setiap juta Unit Termal British) oleh PETRONAS.